



**Sumáriu Kazu  
Tribunál Distritál Suai  
Juñu 2022**

**Afirmasaun:** Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

**JSMP** kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

**A. Sumáriu prosesu julgamentu kazu iha Tribunál Distritál Suai**

**1. Totál kazu ne'ebé JSMP monitoriza: 33**

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD)	Ofensa ba integridade fizika simples ho natureza violénsia doméstika (artigu 2 kona-ba konseitu violensia domestika, artigu 3 kona-ba relasaun familia, artigu 35 kona-ba tipu krime violensia domestika no 36 kona-ba krime sira violénsia doméstika nian hanesan krime publiku)	18
Artigu 172 KP	Koasaun seksuál no Violasaun seksuál	1
Artigu 138 KP no Artigu 138 KP no 23,24 tentativa	omisídiu simples no tentativa omisídiu simples	1
Artigu 172 KP no artigu 23,24 KP	Tentativa violasaun seksuál	1
Artigu 177 KP	Abuzu seksuál ba menór	1
Artigu 145 KP	Ofensa ba integridade fizika simples	3
Artigu 183 KP	Devasa	1
Artigu 172 KP	Violasaun seksuál no agravasaun	1
Artigu 171 KP Artigu 173	koasaun seksuál ho agravasaun ho natureza violénsia doméstika (artigu 2 kona-ba konseitu violensia domestika, artigu 3 kona-ba relasaun familia, artigu 35 kona-ba tipu krime violensia domestika no 36 kona-ba krime sira violensia domestika nian hanesan krime publiku).	1

Artigu 178 KP	Aktu seksuál ho adoloxente	1
artigu 139 KP no no Artigu 20, nu 1, lei nu 5/2017, Arma Brankas	Omisídiu agravadu ho arma brankas	1
Artigu 292 KP	Korupsaun pasiva ba aktu ilisitu	1
Artigu 177 KP no artigu 172 KP	Abuzu seksuál ba menór no violasaun seksuál	1
Artigu 1757, 1758, 1759, 1762, 1765, 1786, 1782, 1804, 1805 KS (Kódigu Sivil)	Ezersísiu póder paternál	1
<b>Totál</b>		<b>33</b>

## 2. Totál desizaun ne'ebé JSMP monitoriza:17

Tipu pena	Artigu	Númeru
Suspensaun ba prizaun nia ezekusaun	Artigu 68 KP	6
Pena prizaun	Artigu 66 KP	1
Pena Multa	Artigu 67 KP	3
Omologa	Artigu 262 KPP	5
Absolve		2
<b>Totál</b>		<b>17</b>

## 3. Totál kazu sira ne'ebé adia tuir JSMP nia monitorizasaun: 2

Razaun adiamentu	Númeru
Razaun adiamentu tanba arguidu la kompri notifikasaun husi tribunál	2
<b>Total</b>	<b>2</b>

## 4. Totál kazu sira ne'ebé sei kontinua tuir JSMP nia monitorizasaun : 14

### B. Deskrisaun sumáriu julgamentu desizaun ba kazu sira

#### 1. Krime tentativa violasaun seksuál

Nú prosesu : 0013/17. BBBBV  
 Kompozisaun tribunál : Koletivu  
 Juis : Dr. Samuel da Costa Pacheco, Dr. Benjamin Barros no Dra. Patricia de Araújo Fatima Barreto Magno Xavier  
 Prokuradór : Dr. Gustavo da Silvaa  
 Defeza : Dr. Domingos dos Santos  
 Desizaun : Absolve

Iha 01 Juñu 2022, Tribunál Distritál Suai prezide julgamentu leitura akordaun ba krime tentativa violasaun seksuál, ne'ebé envolve arguidu EdJ hasoru lezada EdJB, iha Munisípiu Bobonaro.

#### Akuzasaun prokuradór

Prokuradór akuza katak iha 07 Setembru 2017, iha oras tuku 22:00 kalan, lezada mesak iha uma no arguidu liu husi janela tama ba lezada nia kuartu, hafoin ne'e lezada nia maun hetan arguidu no arguidu tauk ba subar iha lezada nia inan aman nia kuartu, tuir mai lezada nia

família kaer arguidu no família rua tur hamutuk resolve no arguidu fó sala osan US\$ 2000.00, karau vaka rua, fahi ida no belak ida.

Akontese daruak iha 26 Dezembru 2017, iha oras tuku 23:30 kalan, arguidu tama ba lezada nia kuartu no dada lezada nia manta ne'ebé lezada taka, lezada hakfodak hadeer foti telefone atu telefone ba nia bin maibé arguidu hadau tiha telefone no soe ba kama okos no hatete ba lezada dehan *óhakilar hau lori tudik sona mate ó*, lezada tauk no halai sai husi kuartu ba subar iha meja okos, arguidu sai ba buka lezada maibé lahetan, nune'e lezada halai sai husi uma ba fó hatene ba testemuña Filipi no testemuña Filipi kontinua ba fó hatene ba membru F-FDTL no ba kaer arguidu iha lezada nia uma.

Prokuradór akuza arguidu kontra artigu 172 KP kona-ba violasaun seksuál ho moldura penál tinan 5 to'o tinan 15 konjuga ho artigu 23, 24 KP kona-ba tentativa violasaun seksuál.

### **Produsaun ba prova sira**

Iha prosesu julgamentu arguidu konfesa ba faktu sira ne'ebé akontese iha 07 Setembru 2017, iha momentu kalan ne'e arguidu tama ba lezada nia kuartu liu husi janela no lezada nia maun haree nune'e arguidu ba subar iha lezada nia inan-aman nia kuartu iha kama okos, arguidu deklara katak la kaer lezada nia orgaun seksuál sensitivu sira, maibé ba kazu ne'e família rua tur hamutuk resolve ona tuir família no fó ona osan US\$2000.00, karau vaka rua, fahi ida no belak ida ba lezada.

Arguidu deklara liu tan katak kazu akontese iha 26 Dezembru 2017, iha oras tuku 10:00 arguidu ba iha lezada sira nia uma atu toba iha ne'eba, arguidu haktuir katak kalan ne'e lezada toba iha kuartu mós arguidu lahatene no arguidu hanoin lezada nia alin Andre nune'e arguidu dada manta maibé arguidu haree lezada mak toba hela, arguidu hakfodak sai ba liur, arguidu laka'er lezada nia orgaun seksuál no la ameasa lezada.

Alende ne'e lezada deklara katak momentu akontesimentu ne'e arguidu tama ba lezada nia kuartu liuhusi janela no lezada nia maun hetan arguidu, nune'e arguidu tauk no ba subar iha lezada nia inan aman nia kama okos, lezada haktuir katak kalan ne'e arguidu lakaer lezada nia orgaun seksuál.

Lezada deklara tan katak kona-ba akontesimentu daruak ne'e arguidu atu tama ba uma laran no lezada mak haree uluk arguidu nune'e lezada halai sai husi uma ba hodi ba fó hatene ba testemuña no testemuña ba kedas lezada nia uma no kaer arguidu, lezada haktuir katak kona-ba kazu ida ne'e iha faktu balu ne'ebé inventa. Lezada deklara katak arguidu laker lezada nia isin sira, reforsa liu tan katak arguidu sempre ba toba iha uma maibé nunca book lezada, lezada haktuir liu tan katak arguidu bain-bain mós nunca book ema nia oan sira.

### **Alegasaun finál**

Prokuradór haktuir katak, iha julgamentu produsaun ba prova, arguidu deklara katak ba kazu rua ne'e arguidu la kaer lezada nia orgaun seksuál sensitive sira no lezada rasik konfirma katak arguidu nunca kaer lezada nia orgaun seksuál no la ameasa lezada, nune'e husu ba tribunál atu fó justisa ba arguidu.

Entretantu defeza haktuir katak, arguidu lakaer lezada nia isin, la ameasa lezada no lezada mós hatete katak arguidu lakaer lezada nia isin, defeza entende katak krime ne'ebé inputa ba arguidu ne'e la priense krime violasaun seksuál, tanba ne'e husu ba tribunál atu absolve arguidu.

## **Desizaun**

Depoizde avalia faktu hotu, tribunál konsidera arguidu la provadu komete krime tentativa violasaun seksuál, tanba iha julgamentu arguidu ho lezada deklar katak arguidu tama duni uma laran no ba liu toba iha lezada ninia-inan aman nia kuartu kama okos no arguidu la kaer lezada nia orgaun seksuál sensitive sira. Nune'e tribunál konklui prosesu ne'e no absolve arguidu hosi krime.

## **2. Krime koasaun seksuál no violasaun seksuál**

Nu prosesu : 0014/21.CVSUI  
Kompozisaun tribunál : Koletivu  
Juis : Dra. Patricia de Araujo F. B. M. Xavier, Dr. Samuel da Costa  
Paseco no Dr. Benjamin Barros,  
Prokuradór : Dr. Rafael Jeronimo Gusmão  
Defeza : Dr. Albano Maia  
Desizaun : Absolve

Iha 01 Juñu 2022, Tribunál Distritál Suai prezide julgamentu leitura akordaun ba krime koasaun seksuál no violasaun seksuál ne'ebé envolve arguidu LR hasoru lezada AM, iha Munisípiu Covalima.

## **Akuzasaun prokuradór**

Prokuradór akuza katak laron la apura maibé iha fulan Marsu 2021, iha oras tuku 17:00 lokraik, lezada mesak iha uma, derepente arguidu tama lezada nia uma, lezada haree no tauk arguidu no halai ba dapur laran, maibé arguidu tuir lezada no dada lezada ba uma laran, lezada tenta atu halai maibé arguidu kaer metin lezada nia liman. Arguidu ho obriga tenta atu halo relasaun seksuál ho lezada maibé lakongue tanba asu hatene nune'e arguidu halai ba liu nia uma.

Akontese ba dala rua iha 14 Maiu 2021, iha oras tuku 17:00 lokraik lezada hamutuk ho nia inan ki'ik fila husi sira nia avo nia toos atu ba uma, banhira to'o iha lezada nia inan ki'ik nia uma lezada la'o liu ba ninia uma no iha dalan klaran (tali laran), arguidu derepente hamri'ik iha *jambua* okos no bolu lezada, *ó mai lai nune'e lezada hakat ba arguidu no arguidu kaer lezada nia liman no dada lezada ba iha tali laran*, lezada sente tauk no hatete ba arguidu dehan *ó beik teen loos ó hanesan ne'e hau orsida hakilar ona*, arguidu mós hatan dehan *ó hakilar hau buti mate ó*, tanba lezada ta'uk ho arguidu nia amiasa ne'e lezada nonok de'it.

Arguidu ho obriga kolu lezada nia roupa no halo relasaun seksuál ho lezada, maske lezada tenta hakilar maibé hakilar lezada nia lian sai la boot tanba arguidu buti metin lezada nia kokorok.

Prokuradór akuza arguidu kontra artigu 171 KP kona-ba koasaun seksuál ho moldura penál tinan 2 to'o tinan 8 no artigu 172 KP kona-ba violasaun seksuál ho moldura penál tinan 5 to'o tinan 15.

## **Produsaun ba prova sira**

Iha prosesu julgamentu arguidu konfesa faktu hotu iha akuzasaun, maibé arguidu deklar katak halo relasaun seksuál ne'e ho konsentimentu. Arguidu deklar liu tan katak halo relasaun seksuál ho lezada hamutuk dala tolu, primeiru halo relasaun seksuál ne'e iha jalan to'ol, relasaun seksuál ba dala rua ne'e iha lezada nia uma no relasaun seksuál ba dala tolu ne'e iha tali laran.

Arguidu deklara katak arguidu iha relasaun namorada ho lezada no bainhira atu halo relasaun seksuál iha *jalan tool* sira rua telefone malu no hasoru malu iha *jalan tool*.

Arguidu haktuir tan katak momentu sira halo relasaun seksuál ba dala rua iha lezada nia uma ne'e arguidu husu lezada no lezada mós hatan no sira halo duni relasaun seksuál.

Arguidu deklara katak halo relasaun seksuál ba dala tolu iha tali laran ne'e sira rua kontaktu malu liu husi telefone no bainhira halo hotu relasaun seksuál lezada nia ama ki'ik bolu lezada nune'e lezada sai ba hasoru nia ama ki'ik.

Alende ne'e lezada kontinua konfirma faktu iha akuzasaun no deklara katak la iha relasaun namorada ho arguidu. Lezada deklara liu tan katak nunka ho arguidu halo relasaun seksual iha *jalan tool*.

Tribunál dúvida ho arguidu no lezada nia deklarasaun kona-ba arguidu dehan halo relasaun seksuál dala tolu enkuantu lezada dehan halo dala ida.

Iha prosesu akareasaun ne'e, lezada konfirma arguidu nia deklarasaun katak halo relasaun seksuál ho arguidu iha *jalan tool*.

Testemuña AM, hanesan lezada nia inan ki'ik, depoimenta katak momentu akontesimentu ne'e testemuña bolu lezada no haree arguidu ho lezada iha duut laran. Testemuña haree arguidu dada ninia kalsa halai no testemuña duni tuir arguidu, bainhira testemuña duni tuir arguidu la toman, testemuña fila mai husu lez no lezada fó hatene ba testemuña dehan arguidu obriga rasta lezada tama ba duut laran.

Testemuña haktuir katak banhira ba haree lezada ne'e lezada nia roupa sira nein ida mak nakles no la iha fitar ida iha lezada nia isin.

Testemuña LIG hanesan lezada nia prima, depoimenta katak antes lezada ho arguidu atu namora ne'e testemuña mak manu ain ba sira nain rua no sira rua konsege namora. Testemuña depoimenta tan katak kalan ne'e lezada uza testemuña nia telefone hodi haruka mensagem ba arguidu liu husi testemuña nia facebook no sira rua hasoru malu. Testemuña haktuir katak arguidu ho lezada namora ne'e, lezada no arguidu nia familia móshatene hotu.

### **Alegasaun finál**

Prokuradór haktuir katak arguidu komete krime koasaun seksuál no violasaun seksuál hasoru lezada, maibé iha produsaun ba prova arguidu konfesa parsialmente katak arguidu halo relasaun seksuál ho lezada maibé ho konsentimentu no halo relasaun seksuál hamutuk dala tolu. Enkuantu lezada konfirma katak arguidu obriga de'it lezada no kaer lezada nia orgaun seksuál no halo violasaun seksuál, maibé iha akareasaun ne'e lezada konfirma arguidu nia deklarasaun, tanba ne'e prokuradór haree katak krime violasaun seksuál ne'e la priense, nune'e husu ba tribunál atu halo alterasaun krime rua ne'e ba fali aktu seksuál adolexente tanba momentu akontesimentu ne'e lezada foin atinji tinan 15, ho nune'e husu atu kondena arguidu ho pena prizaun tinan tolu suspende ba tinan haat.

Entretantu defeza haktuir katak, arguidu ho lezada iha relasaun namorada no halo relasaun seksuál hamutuk dala tolu no arguidu la obriga lezada no ho konsentimentu, tanba ne'e husu ba tribunál atu absolve arguidu husi prosesu no selu kusta judisiál. Kona-ba prokuradór nia pedidu alterasaun ne'e defeza mantein ho akuzasaun ne'e.

## **Desizaun**

Tribunál koletivu delibera no indefere pedidu husi prokuradór kona-ba alterasaun. Tribunál koletivu avalia faktu hotu no konsidera arguidu ninia hahalok ne'e la priense krime ne'ebé inputa ba arguidu, tanba iha julgamentu tribunál fiar liu arguidu nia deklarasaun katak arguidu ho lezada iha relasaun namorada no sira nain rua halo relasaun seksuál ba kazu ida ne'e hamutuk dala tolu, tribunál mós fó fiar ba deklarasaun ba akareasaun nian katak lezada konfirma arguidu nia deklarasaun katak arguidu ho lezada halo relasaun seksuál iha *jalan tool* no halo relasaun seksuál ho konsentimentu, nune'e tribunál konklui no absolve arguidu.

### **3. Krime ofensa ba integridade fízika simples**

Nú. Prosesu : 0027/22.CVSUI  
Kompozisaun tribunál : Singular  
Juiz : Dr. Samuel da Costa Pacheco  
Prokuradór : Dr. Rafael Jerónimo Gusmão  
Defeza : Dr. Albino de Jesus Pereira  
Desizaun : Omologa pedidu dezisténsia keixa

Iha 01 Juñu 2022, Tribunál Distritál Suai prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Sergio Alberto Gusmão hasoru nia tia lezada Domitilda Kolo, iha Munisipiu Covalima.

#### **Akuzasaun Prokuradór**

Prokuradór akuza katak iha 28 FEVEREIRU 2022, iha oras tuku 08:00 dadeer, iha aldeia Lo'ó, suku Suai Loro, arguidu tuku dala ida iha lezada nia hasan parte karuk no tuku dala ida mós iha lezada nia matan fukun parte karuk rezulta kanek no bubu.

Prokuradór akuza arguidu prátika krime kontra artigu 145 KP kona-ba ofensa ba integridade fízika simples ho moldura penál tinan 3 ka multa.

#### **Produsaun ba prova sira**

Bazeia ba artigu 262 KPP kona-ba tentativa konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba lezada ho arguidu.

Iha prosesu tentativa konsiliaun ne'e, lezada hakarak dame malu ho arguidu sein kondisaun ruma, tanba antes ne'e arguidu ho lezada dame malu ona. Arguidu konkorda ho pedidu lezada nian no hatutan mós katak arrepende ninia hahalok no promete sei la halo tan hahalok hanesan hasoru lezada iha futuro. Nune'e lezada husu ba tribunál atu deziste ninia keixa hasoru arguidu.

#### **Alegasaun final**

Prokuradór ho defeza apresia akordu dame malu ne'ebé parte nain rua decide ona no husu ba tribunál atu omologa prosesu ida ne'e.

## **Desizaun**

Bazeia artigu 262 nú 2 KPP no akordu dame malu husi parte nain rua no pedidu dezisténsia keixa husi lezada. Nune'e tribunál omologa akordu dame malu ne'e.

### **4. Krime Ofensa Ba Integridade Fízika Simples Ho Natureza Violénsia Doméstika**

Nú. Prosesu : 0001/18. MFMFI  
Kompozisaun tribunál : Singular  
Juis : Dr. Benjamin Barros.

Prokuradór : Dr. Rafael Jerónimo Gusmão  
Defeza : Dr. Domingos dos Santos  
Desizaun : Pena multa US\$. 60.00.

Iha 01 Juñu 2022, Tribunál Distritál Suai prezide julgamentu leitura sentensa ba krime ofensa ba integridade física simples ho natureza violênsia doméstika ne'ebé envolve arguidu PVNdS hasoru nia feen RP, iha Munisipiu Manufahi.

### **Akuzasaun prokuradór**

Prokurador akuza katak iha 23 Janeiro 2018, oras tuku 22:40 kalan, arguidu tuku dala ida iha lezada nia matan fukun parte karuk no tebe dala ida kanotak parte loos. Antes ne'e arguidu ho kondisaun lanu iha kalan boot arguidu tama uma, nune'e lezada hirus, tolok no trata aat arguidu, arguidu nerboju no halo agreasaun hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál tinan 3 ka multa konjuga ho artigu 2, (a) 3 (b), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no deklarasaun katak depoisde akontesimentu arguidu husu deskulpa ona ba lezada no sira nain rua di'ak malu ona, arrepende ninia hahalok no promete sei la halo tan hahalok hanesan iha futuru no arguidu foin primeiravés mai hatan iha tribunál.

Alende ne'e, lezada konfirma faktu sira iha akuzasaun, di'ak malu ona no to'o agora arguidu la baku ona lezada.

### **Alegasaun finál**

Prokuradór haktuir katak arguidu provadu komete krime hasoru lezada bazeia ba arguidu nia deklarasaun no konfirma husi lezada, maibé prokuradór harre katak arguidu ho lezada hela hamutuk nafatin no iha possibilidade bele akontese krime foun, nune'e husu ba tribunál atu kondena arguidu tuir artigu 145 KPP.

Entretantu defeza husu ba tribunál atu aplika pena multa ba arguidu tanba arguidu konfesa integralmente ba faktu sira hotu, arguidu arrepende, promete sei la halo tan hahalok hanesan iha futuru, di'ak malu ona no arguidu foin primeiravés mai hatan iha tribunál.

### **Desizaun**

Depoisde avalia faktu sira hotu, tribunál prova katak arguidu tuku dala ida iha lezada nia matan fukun no tebe dala ida lezada nia kanotak parte loos. Bazeia ba faktu provadu sira ne'e no tetu mós sirkuntansia atenuante sira hanesan arguidu konfesa, arrepende, foin primeiravés mai hatan iha tribunál no di'ak malu ona, nune'e tribunál konklui prosesu ne'e no kondena arguidu ho pena multa US\$60.00, arguidu sei selu kada loron US\$1.00 durante loron 60. Bainhira arguidu la selu pena multa refere, arguidu kompri pena alternativa loron 40 prizaun.

### **5. Kazu sivíl regulasaun ba ezersísiu podér paternál**

Nú. Prosesu : 0079/21 CVTDS  
Kompozisaun Tribunál : Singulár  
Juis : Dr. Jose Maria de Araujo  
Prokuradór : Dr. Nelso Jose Soares Magno  
Defeza : Dr. Domingos dos Santos  
Desizaun : Omologa Akordu

Iha 02 Juñu 2022, Tribunál Distritál Suai prezide julgamentu tentativa konsiliaun ba kazu regulasaun ezersísiu podér paternal, ne'ebé envolve autór nain rua JldGM ho idade tinan 5 no ALdG tinan 8 hasoru rekeridu norekerida JMdS no SdG nu'udar autór nia inan-aman , iha Munisípiu Covalima.

### **Termu no fundamentu sira**

Iha 15 Novembru 2021, rekerida ho rekeridu problema tanba rekeridu bosok rekerida dehan ba Dili, maibé hetan informasaun husi nia kolega ne'ebé serbisu iha otel katak rekeridu lori feto ba toba iha otel, ikus família rua tur hamutuk hodi resolve sira nia problema ne'e maibé laiha solusaun, nune'e menór nain rua liu husi prokuradór hatama asaun ne'e atu rekeridu hanesan aman hodi bele tau matan ba menór nain rua nia nesesidade loro-loron nian.

Kazu ne'e relaciona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS, kona-ba responsabilidade inan-aman ba menór sira.

### **Tentativa konsiliaun**

Iha julgamentu tentativa konsiliaun rekeridu no rekerida konkorda menór sira nafatin hela ho rekerida (sira nia inan). Rekerida no rekeridu konkorda rekeridu ba vizita menór nain rua iha loron sabadu no lori ba uma no loron domingu lokraik lori menór nain rua ba fali rekerida. Rekerida deklara katak kada fulan menór nain rua gasta osan US\$30.00 kada ema ida US\$15.00. Rekeridu mós konkorda no prontu atu fó alimetasau ba ninia oan sira (menór nain rua) kada fulan, Rekeridu hahu husi loron 1 to'o 10 fulan Jullu manda ona osan liu husi MOSAN ba menór sira.

### **Alegasaun finál**

Prokuradór representa menór no defeza husu ba tribunál atu omologa akordu ne'ebé rekeridu no rekerida konkorda hamutuk atu tau matan ba menór nain rua.

### **Desizaun**

Tribunál bazeia ba rekeridu no rekerida ninia akordu kona-ba regime guarda, alimentus no vizita, nune'e tribunál konklui omologa akordu.

## **6. Krime Ofensa Ba Integridade Fízika Simples Ho Natureza Violênsia Doméstika**

Nú. Prosesu	: 0001/19. MFMFI
Kompozisaun tribunál	: Singular
Juiz	: Dr. Benjamin Barros.
Prokuradór	: Dr. Rafael Jerónimo Gusmão
Defeza	: Dr. Anselmo Pinto
Desizaun	: Pena multa

Iha 03 Juñu 2022, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violênsia doméstika ne'ebé envolve arguidu CDC hasoru nia feen MTA, iha Munisipiu Manufahe.

### **Akuzasaun prokuradór**

Prokurador akuza katak iha 20 Marsu 2019, kalan arguidu tuku dala ida iha lezada nia matan parte fukun parte karuk rezulta moras bubu no ran sai. Antes agreasaun ne'e lezada fó hatene kona-ba sira nia viziñu nia oan mane baku sira nia oan, maibé arguidu hatan dehan *viziñu nia oan mós hanesan ita nia oan*, lezada hirus, tolok no trata aat arguidu, arguidu nerboju no komete krime ne'e hasoru lezada.



Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (b), 35 (b) no 36 LKVD.

### **Produsaun ba prova sira**

Iha prosesu julgamentu arguidu konfesa integralmente ba faktu sira iha akuzasaun no deklarata katak depoisde akontesimentu arguidu husu kedas deskulpa ba lezada, di'ak malu ona ho lezada, arrepende ninia hahalok, foin primeiravés mai hatan iha tribunál, to'o agora la iha ona problema seluk no promete sei larepete tan ninia hahalok hanesan hasoru lezada no ema seluk iha futuru

Presinde lezada tanba arguidu konfesa faktu hotu iha akuzasaun.

### **Alegasaun finál**

Prokuradór konsidera arguidu provadu komete krime hasoru lezada bazeia ba arguidu nia deklarasaun. Tanba ne'e husu ba tribunál atu kondena arguidu tuir hahalok ne'ebé arguidu komete.

Entretantu defeza husu ba tribunál atu aplika pena admoestasaun ba arguidu tanba arguidu konfesa integralmente ba faktu sira, arguidu arrepende, promete sei la halo tan hahalok hanesan iha futuru, di'ak malu ona no arguidu foin mak primeiravéz mai hatan iha tribunál.

### **Desizaun**

Depoisde avalia faktu hotu, tribunál prova katak arguidu tuku dala ida iha lezada nia matan parte karuk. Nune'e bazeia ba faktu provadu ne'e no tetu mós sirkunstánsia atenuante sira hotu hanesan arguidu konfesa, promete sei lahalo tan hahalok hanesan ba lezada iha futuru, arguidu ho lezada mós di'ak malu ona no arguidu foin primeiravés mai hatan iha tribunál, tanba ne'e tribunál konklui prosesu ne'e no kondena arguidu ho pena multa US\$120,00, ne'ebé arguidu sei selu US\$1,00 kada loron durante loron 120. Tribunál mós aplika pena alternativa durante loron 80 kuandu arguidu la selu pena multa refere.

## **7. Krime ofensa ba integridade fizika simples ho natureza violénsia doméstika**

Nú prosesu : 0011/21. BBBLB  
Kompozisaun Tribunál : Singulár  
Juis : Dra. Patricia de Araújo Fatima Barreto Magno Xavier.  
Prokuradór : Dr. Rafael Jeronimo Gusmão  
Defeza : Dr. Domingos dos Santos  
Desizaun : Pena prizaun tinan 1 suspende ba tinan 1

Iha 07 Juñu 2022, Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violénsia doméstika envolve arguidu LdSCG hasoru nia eis feen AMP, iha Munisípiu Bobonaro.

### **Akuzasaun prokuradór**

Prokuradór akuza katak iha 08 Setembru 2021, iha oras tuku 10:00 dadeer, arguidu baku dala ida iha lezada nia *helem* no buti lezada nia kakorok. Antes agreasaun ne'e lezada kondus motor husi Maliana vila ba Balibo no to'o iha dalan klaran, arguidu hapara lezada nia motor no dehan ba lezada atu buka problema ho lezada, lezada mós hatan katak, hakara problema ita ba resolve iha ó nia inan-amannia oin, nune'e sira lori malu ba iha arguidu nia inan-aman hodi resolve sira nia problema maibé la iha solusaun tanba lezada la konkorda sira nia oan fetu boot ba hela fali ho arguidu, nune'e arguidu nerboju komete krime hirak ne'e hasoru lezada.

Prokuradór akuza arguidu kontra artigu 145 KP kona-ba ofensa integridade fizika simples ho moldura penál tinan 3 ka multa konjuga ho artigu 2 (a), 3, (b) 35, (b) no 36 LKVD.

### **Produsaun ba prova sira**

Iha prosesu julgamentu arguidu deklara katak faktu sira ne'e la loos hotu, arguidu deklara katak hakarak ninia oan feto ne'e ba hela fali ho arguidu maibé lezada lakoi, arguidu nerboju baku sae lezada nia helem ne'ebé lezada doku iha nia ulun, arguidu rejeita katak labuti lezada nia kakorok no foin primeiravés mai hatan iha tribunál.

Alende ne'e lezada deklara katak momentu fila husi Maliana no to'o iha dalan arguidu hapara no hatete hakarak buka probela hasoru lezada, maibé lezada hatan katak hakarak problema ba iha arguidu nia inan-aman nia oin, nune'e sira to'o iha uma no diskuti kona-ba labarik ne'ebé hela ho lezada ne'e maibé lezada lakoi entrega sira nia oan feto ne'e ba nia aman, nune'e arguidu baku sae lezada nia kapaset nia vidur no buti lezada nia kakorok maibé lasente moras, lezada deklara liu tan katak moris separadu ona ho arguidu.

### **Alegasaun finál**

Prokuradór husu ba tribunál atu apresia ba lezada nia deklarasaun, mesmu arguidu halo agreasaun hasoru lezada ne'e lasente moras maibé arguidu buti duni lezada nia kakorok no baku sae helem ne'ebé lezada doku.

Entretantu defeza haktuir katak arguidu deklara katak labaku lezada no labuti lezada nia kakorok, maibé bainhira rona fali lezada katak baku sae lezada nia helem no buti lezada nia kakorok maibé lezada lasente moras, defeza entende katak agora dadaun ne'e sira separadu ona no la iha ona krime foun atu akontese tan, nune'e husu ba tribunál atu aplika pena ne'ebé mais adekua mak pena admoestasaun.

### **Desizaun**

Depoizde avalia faktu hotu, tribunál prova katak arguidu komete krime ofensa ba integridade fizika simples hasoru lezada nu'udar nia eis feen, bazeia ba faktu provadu no tetu mós sirkuntansia atenuante sira hanesan arguidu foin primeiravez mai hatan iha tribunál, maibé tribunál tetu sirkuntansia agravante katak kazu violensia domestika aas tebes, nune'e konklui prosesu no kondena arguidu pena prizaun tinan ida suspende ba tinan ida.

## **8. Krime Abuzu Seksuál ba Menór no Violasaun Seksuál ho Natureza Violénsia Doméstika**

Nú. Prosesu	: 0004/22. CVMCT
Kompozisaun tribunál	: Koletivu
Juis	: Dr. Samuel da Costa Pacheco, Dr. Benjamin Barros no Dra. Patricia de Araújo Fatima Barreto Magno Xavier.
Prokuradór	: Dr. Gustavo da Silva.
Defeza	: Dr. Angelmo Pinto
Desizaun	: Pena prizaun tinan 20

Iha 08 Juñu 2022, Tribunál Distritál Suai prezide julgamentu leitura akordaun ba krime abuzu seksuál ba menór ho violasaun seksuál natureza violénsia doméstika ne'ebé envolve arguidu TG hasoru lezada AC nu'udar oan entiada ho idade tinan 12, iha Munisípiu Covalima.

### **Akuzasaun prokuradór**

Prokuradór akuza katak iha loron la-apuradu fulan Maiu 2020, iha lokraik, lezada fila husi eskola to'o iha uma no han tiha meiudia nian lezada toba mesak iha kuartu laran, derepente arguidu tama ba lezada nia kuartu ho kondisaun la uza roupa no hasai lezada nia roupa hafoin toba iha lezada leten, lezada hakfodak no tenta hakilar maibé arguidu buti metin lezada nia ibun no arguidu kontinua halo relasaun seksuál ho lezada to'o ezekula rezulta lezada nia orgaun seksuál sente moras no ran sai barak. Depois arguidu halo relasaun seksuál ho lezada arguidu ameasa lezada dehan *'se ó hatete sai ba ema seluk hau sei oho mate ó.*

Akontesementu tuir mai iha loron la apura maibé iha fulan Juñu 2021, iha oras tuku 16:00 lokraik lezada dasa hela foer iha sira nia kintal, derepente arguidu dada lezada nia liman makas ba iha to'os laran, hasai lezada nia roupa no obriga halo relasaun seksuál ho lezada to'o ezekula.

Akontesementu tuir fali iha fulan Dezembru 2021, iha lokraik, lezada sai husi eskola fila ba uma han meiudia hotu, lezada sente dukur ba toba iha kuartu laran, derepente arguidu tama ba lezada nia kuartu no hasai nia roupa no obriga hasai lezada nia roupa no halo relasaun seksuál ho lezada.

Prokuradór akuza arguidu kontra artigu 172 KP kona-ba violasaun seksuál ho moldura penál tinan 5 to'o tinan 15 no artigu 177 KP kona-ba abuzu seksuál ba menór no artigu 173 KP kona-ba agravasaun no konjuga artigu 2, (b) 3 (d), 35 (b) no 36 LKVD.

### **Produsaun ba prova sira**

Iha julgamentu, arguidu konfesa integralmente ba faktu sira iha akuzasaun no deklara katak foin primeiravés mai hatan iha tribunál, arguidu arrepende ninia hahalok, promete bainhira sai husi prizaun sei lahalo tan hahalok hanesan ne'e hasoru lezada inklui ema seluk.

Alende ne'e, lezada kontinua konfirma faktu sira hotu iha akuzasaun no deklara katak momentu akontese primeiru lezada foin mak idade tinan 12.

Produsaun prova arguidu konfesa faktu hotu iha akuzasaun nune'e prokuradór no defeza husu ba tribunál presinde testemuña, tribunál mós konkorda no presinde testemuña.

Depoisde produsaun ba prova tribunál haree katak iha krime foun nune'e tribunál husu ba prokuradór no defeza atu halo opozisaun ba tribunál ninia altersaun, maibé prokuradór no defeza la iha opozisaun.

### **Alegasaun finál**

Prokuradór haktuir katak, arguidu provadu komete krime abuzu seksuál ba menór dala rua no violasaun seksuál dala ida hasoru lezada, lezada rasik konfirma no reforsa husi relatóriu mediku husi PRADET, nune'e husu ba tribunál atu kondena arguidu ho pena prizaun tinan 20.

Entretantu, defeza haktuir katak iha julgamentu arguidu konfesa, arrepende ninia hahalok no promete ona bainhira sai husi prizaun sei lakomete tan krime hasoru lezadu no ema seluk, nune'e husu ba tribunál atu kondena arguidu tuir konfiksaun tribunál nian.

### **Desizaun**

Depoisde avilia faktu sira hotu, tribunál prova katak arguidu komete krime abuzu seksuál no violasaun seksuál hasoru lezada, arguidu konfesa no konfirma husi lezada. Bazeia ba faktu provadu hirak ne'e no tetu mós sirkunstánsia sira hotu, nune'e tibunál konklui prosesu ne'e no

kondena arguidu ba krime abuzu seksuál rua (konkursu) ho pena prizaun tinan 20 kada krime tribunál kondena arguidu ho pena prizaun tinan 10, no ba krime violasaun seksuál tribunál kondena arguidu ho pena prizaun tinan 8. Tribunál halo akumulasaun ba krime rua ne'e ho pena prizaun tinan 28 no husi krime ne'e tribunál konklui prosesu ne'e no kondena arguidu ho pena únika tinan 20 prizaun.

### **9. Krime Ofensa ba Integridade Fízika Simples ho Natureza Violênsia Doméstika**

Nú. Prosesu : 0005/21. MFALS  
Kompozisaun tribunál : Singulár  
Juiz : Dra. Patricia de Araújo Fatima Barreto Magno Xavier.  
Prokuradór : Dr. Rafael Jerónimo Gusmão  
Defeza : Dr. Domingos do Santos  
Desizaun : Pena prizaun tinan 1 suspende tinan 2

Iha 13 Juñu 2022, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violênsia doméstika ne'ebé envolve arguidu GT hasoru nia feen MdCS, iha Munisípiu Manufahi.

Akuzasaun prokuradór

Prokuradór akuza katak iha 08 Juñu 2021, oras la-apuradu, arguidu basa dala rua iha lezada nia hasan parte karuk, tuku dala ida iha ren-toos no buti lezada nia kakorok rezulta moras no dada iss ladi'ak. Antes ne'e arguidu ho lezada iha ona problema no lezada sai husi uma ba nia inan-aman no arguidu atu ba vizita ninia oan maibé lezada la autoriza arguidu ho lezada diskute maluarguidu nerbozu no komete krime hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál tinan 3 ka multa konjuga ho artigu 2, (a) 3 (b), 35 (b) no 36 LKVD.

#### **Produsaun ba prova sira**

Iha julgamentu arguidu konfesa faktu hotu iha akuzasaun no deklara katak depoisde akontesementu arguidu ba lezada nia uma no husu deskulpa ba lezada, no iha momentu ne'e sira rua di'ak malu fali no to'o agora la iha problema seluk, arguidu areepende ninia hahalok, promete sei larepete ninia hahalok hanesan hasoru lezada iha futuru no foin primeiravés mai hatan iha tribunál.

Ho arguidu nia konfiksaun ba faktu sira iha akuzasaun, nune'e presinde lezada nia deklarasaun.

#### **Alegasaun finál**

Prokuradór haktuir katak arguidu provadu komete krime ofensa ba integridade fízika simples ho natureza violênsia doméstika hasoru lezada, ne'ebé arguidu rasik konfesa. Alende ne'e prokuradór mós konsidera krime violênsia doméstika kontinua ass, nune'e husu ba tribunál atu kondena arguidu tuir artigu 145 KP nian.

Entretantu defeza husu ba tribunál atu aplika pena multa tanba arguidu konfesa integralmente ba faktu sira hotu iha akuzasaun no arguidu foin primeiravéz komete krime hasoru lezada, arrepende ninia hahalok, arguidu ho lezada di'ak malu ona no moris hamutuk hanesan feen-laen.

#### **Desizaun**

Depoisde avalia faktu hotu, tribunál prova katak arguidu basa dala rua iha lezada nia hasan parte karuk, tuku ren-toos dala ida no buti lezada nia kakorok rezulta lezada dada is araska no sente moras.

Bazeia ba faktu provadu sira ne'e no tetu mós sirkunstánsia atenuante sira hotu, hanesan arguidu konfesa, arrepende, promete sei lahalo tan hahalok hanesan hasoru lezada no ema seluk, di'ak malu ona no arguidu foin mak primeiravés mai hatan iha tribunál. Nune'e tribunál konklui prosesu ne'e no kondena arguidu ho pena prizaun tinan ida suspende ba tinan rua.

#### **10. Krime Ofensa ba Integridade Fízika Simples ho Natureza Violênsia Doméstika**

Nú. Prosesu : 0226/20. BBMLV  
Kompozisaun Tribunál : Singular  
Juiz : Dra. Patricia de Araújo Fatima Barreto Magno Xavier.  
Prokuradór : Dr. Rafael Jerónimo Gusmão  
Defeza : Dr. Domingos do Santos  
Desizaun : Pena prizaun tinan 1 suspende tinan 1

Iha 13 Juñu 2022, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violênsia doméstika ne'ebé envolve arguidu JL hasoru nia eis-fen FS, iha Munisípiu Bobonaro.

#### **Akuzasaun prokuradór**

Prokuradór akuza katak iha19 Dezembru 2020, iha oras tuku 23:00 kalan, lezada haree hela televizaun no arguidu tama mai iha uma laran tolok no trata ho liafuan ladiak hasoru lezada, hafoin arguidu sama dala haat iha lezada nia ulun no arguidu foti sintu baku dala tolu iha lezada nia kotuk laran. Antes ne'e lezada husu ninia osan iha arguidu ne'ebé arguidu fó ba nia feen boot, nune'e arguidu ho lezada diskuti malu no arguidu nerboju komete krime hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál tinan 3 ka multa konjuga ho 2 (a), 3 (b), 35 (b) 36 LKVD.

#### **Produsaun ba prova sira**

Iha julgamentu, arguidu konfesa parsialmente ba faktu sira iha akuzasaun, arguidu deklara katak nia la sama lezada nia ulun tanba iha momentu ne'eba lezada isin rua hela. Arguidu foti sintu baku duni dala rua de'it iha lezada nia kotuk laran no arguidu tolok no trata ho liafuan aat hasoru lezada Arguidu haktuir katak kazu ne'e akontese tanba bainhira hein karau fila mai lezada la nono bee manas no la tein ba han kalan nian.

Entretantu lezada kontinua konfirma faktu sira iha akuzasaun no deklara katak arguidu baku lezada tanba de'it lezada husu nia osan ne'ebé mak arguidu foti fó ba nia fen bo'ot hodi halo lia. Lezada mós hatutan katak to'o agora arguidu ho lezada seidauk di'ak malu no lezada ba hela hamutuk ho nia inan-aman.

#### **Alegasaun finál**

Prokuradór konsidera arguidu provadu komete krime ofensa ba integridade fízika simples ho natureza violênsia doméstika hasoru lezada, mesmu iha julgamentu arguidu konfesa parsialmente ba faktu sira iha akuzasaun, maibé lezada kontinua konfirma faktu hotu iha akuzasaun, ho razaun hirak ne'e husu ba tribunál atu kondena arguidu ho pena suspensaun.

Entretantu defeza husu ba tribunál atu aplika pena suspensaun tanba arguidu konfesa parsialmente ba faktu sira iha akuzasaun no durante ne'e arguidu la halo tan krime hasoru lezada ka ema seluk.

### **Desizaun**

Depoisde avalia faktu hotu, tribunál konsidera arguidu provadu komete krime ofensa ba integridade fizika simples natureza violénsia doméstika, mesmu arguidu nega faktu balun maibé lezada kontinua konfirma. Bazeia ba faktu provadu hirak ne'e tetu mós sirkuntánsia hotu-hotu ne'ebé haleu iha krime ne'e, nune'e tribunál konklui prosesu ne'e no kodená arguidu ho pena prizaun tinan ida suspende ba tinan ida.

### **11. Krime devasa**

Nú prosesu : 0325/20.PCCIC  
Kompozisaun tribunál : Singulár  
Juis : Dr. Benjamin Barros  
Prokuradór : Dr. Gustavo da Silva  
Defeza : Dr. Albano Maia  
Desizaun : Omologa dezistensia keixa

Iha 20 Juñu 2022, Tribunál Distritál Suai preside julgamentu tentativa konsiliaun ba kazu devasa ne'ebé envolve arguidu CDMG hasoru lezada MIJ, iha Munisípiu Ainaro.

### **Akuzasaun prokuradór**

Prokuradór akuza katak loron la apuradu, maibé fulan Dezembru 2020, arguidu publika lezada nia fotografia porno ho arguidu facebook. Arguidu publika lezada nia fotografia porno ne'e tanba lezada lakohi namora ona ho arguidu.

Prokuradór akuza arguidu kontra artigu 183 KP kona-ba devasa ho moldura penál tinan 1 ka multa.

### **Produsaun ba prova sira.**

Bazeia ba artigu 262 nú.1 KPP kona-ba tentativa konsiliaun, nune'e antes tama ba julgamentu produsaun ba prova, juis husu halo tentativa konsiliaun ba lezadu ho arguidu.

Iha prosesu tentativa konsiliaun ne'e lezada hakarak dada ninia keixa hasoru arguidu sein kondisaun tanba antes ne'e sira dame malu ona no agora sira moris hamutukhanesan feen laen, arguidu mós konkorda ho lezada ninia pedidu dezistensia keixa no promete sei la repete tan hahalok hanesan iha futuru.

### **Alegasaun finál**

Prokuradór no defeza husu ba tribunál atu omologa parte rua ninia akordu dame no absolve arguidu husi krime.

### **Desizaun**

Bazeia ba akordu dame husi parte rua no pedidu dezisténsia keixa husi lezada. Nune'e tribunál konklui prosesu ne'e no omologa kedas akordu pedidu dezisténsia keixa ne'e no absolve arguidu husi krime.

### **12. Krime ofensa ba integridade fizika simples**

Nú prosesu : 0001/22.MFALS  
Kompozisaun tribunál : Singulár

Juis : Dr. Samuel da Costa Pacheco  
Prokuradór : Dr. Rafael Jeronimo Gusmão  
Defeza : Dr. Domingos dos Santos  
Desizaun : Omologa dezistencia keixa

Iha 20 Juñu 2022, Tribunál Distritál Suai preside julgamentu tentativa konsiliaun ba kazu ofensa ba integridade fizika simples ne'ebé envolve arguidu EA hasoru lezada BA, iha Munisípiu Manufahe.

### **Akuzasaun prokuradór**

Prokuradór akuza katak iha 13 Janeiru 2022, iha oras tuku 15:00 lokraik, arguidu buti lezada nia kakorok no riba lezada ba rai. Antes agreasaun hirak ne'e lezada nia fahi tama arguidu nia toos laran no han hotu aifarina, fehuk sira iha toos laran no arguidu ho lezada haksasuk malu nune'e arguidu nerboju komete krime ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka Multa.

### **Produsaun ba prova sira.**

Bazeia ba artigu 262 nú. 1 KPP kona-ba tentativa konsiliaun, nune'e antes tama ba julgamentu produsaun ba prova, juis husu halo tentativa konsiliaun ba kazu sira semi publiku. Iha prosesu tentativa konsiliaun ne'e lezada hakarak dada ninia keixa ne'ebé hasoru arguidu sein kondisaun, alende ida ne'e arguidu mós simu lezada nia pedidu no promete futuru sei larepete tan hahalok ne'e hasoru lezada no ema seluk.

### **Alegasaun finál**

Prokuradór no defeza husu ba tribunál atu omologa prosesu ne'e.

### **Desizaun**

Tribunál bazeia ba lezada ninia dezistencia keixa no akordu dame malu, nune'e tribunál konklui prosesu ne'e no no omologa akordu dame no absolve arguidu husi krime.

### **13. Krime ofensa ba integridade fizika simples**

Nú prosesu : 0082/20.CVSUI  
Kompozisaun tribunál : Singulár  
Juis : Dr. Benjamin Barros  
Prokuradór : Dr. Rafael Jeronimo Gusmão  
Defeza : Dr. Domingos dos Santos  
Desizaun : Omologa dezistencia keixa

Iha 22 Juñu 2022, Tribunál Distritál Suai prezide julgamentu tentativa konsiliaun ba kazu ofensa ba integridade fizika simples ne'ebé envolve arguidu Egidro Araújo da Silva hasoru lezada Maria da Costa, iha Munisípiu Covalima.

### **Akuzasaun prokuradór**

Prokuradór akuza katak iha 02 Outobru 2021, iha oras tuku 9:00, arguidu lori bisikleta tuda ba lezada, buti lezada nia kakorok no tuku dala ida lezada nia kotuk laran. Antes agreasaun sira ne'e lezada ba arguidu nia uma haksasuk malu ho arguidu nia inan no tolok arguidu nia inan, nune'e arguidu nervoju halo agreasaun hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka Multa.

### **Produsaun ba prova sira.**

Bazeia ba artigu 262 nú.1 KPP kona-ba tentativa konsiliaun, nune'e antes tama ba julgamentu produsaun ba prova, juis husu halo tentativa konsiliaun ba kazu sira semi públiku.

Iha prosesu tentativa konsiliaun ne'e, arguidu ho lezada deklara katak antes ne'e sira rezolve ona problema ne'e tuir kultura Suia nian. Nune'e, lezada hakarak deziste nia keixa hasoru arguidu no arguidu mós promete sei lakomete tan krime hanesan iha futuru.

### **Alegasaun finál**

Prokuradór no defeza husu ba tribunál atu omologa dame ne'e parte rua konkorda ona.

### **Desizaun**

Tribunál bazeia ba akordu dame husi parte sira no dezistensia keixa husi lezada, nune'e tribunál konklui prosesu ne'e hodi omologa no absolve arguidu .

## **14. Krime ofensa ba integridade fizika simples ho natureza violênsia doméstika**

Nú. Prosesu	: 0016/21. BBCLC
Kompozisaun tribunál	: Singular
Juiz	: Dr. Samuel da Costa Pacheco
Prokuradór	: Dr. Rafael Jerónimo Gusmão
Defeza	: Dr. Albino de Jesus Pereira
Desizaun	: Pena prizaun tinan 1 suspende nia ezekusaun tinan 1

Iha 24 Juñu 2022, Tribunál Distrál Suai prezide julgamentu leitura sentensa ba krime ofensa ba integridade fizika simples ho natureza violênsia doméstika ne'ebé envolve arguidu AdRV hasoru nia feen IdS, iha Munisípiu Bobonaro.

### **Akuzasaun prokuradór**

Prokuradór akuza katak iha 08 Juñu 2021, iha oras tuku 16:00 lokraik, lezada ba kioske no fila mai haree arguidu tuur hela iha viziñu nia uma nune'e lezada bolu no husu arguidu dehan *'akai nia apa, fó telefone mai'* no arguidu hatan lezada dehan *"asu nusá mak ó buka tuir ha'u ne'e"* arguidu hakat ba no tuku kedas dala rua iha lezada nia kanuruk parte kotuk, basa dala rua iha hasan parte karuk no arguidu tuda lezada nia telefone ho marka OPO ba rai.

Antes ne'e iha 14 Feveireiru 2020 arguidu halo ona agresaun hasoru lezada, arguidu basa dala ida iha lezada nia hansen parte karuk, maibé lezada la hato'o keixa.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (b), 35 (b) no 36 LKVD.

### **Produsaun ba prova sira**

Iha prosesu julgamentu arguidu konfesa faktu sira iha auzasaun no deklara katak agora dadaun ne'e di'ak malu ona no la iha ona problema seluk, arguidu deklara tan katak foin primeiravéz mai hatan iha tribunál no promete sei la komete tan krime iha futuru hasoru lezada no ema seluk.

Alende ne'e, lezada kontinua konfirma faktu sira hotu iha akuzasaun no deklara katak depoisde akontesimentu arguidu ho lezada di'ak malu ona no to'o agora arguidu la baku ona lezada.



## **Alegasaun finál**

Prokuradór konsidera arguidu provadu komete krime ofensa integridade fízika simples hasoru lezada. Bazeia ba arguidu nia deklarasaun ne'ebé konfesa integralmente ba faktu sira iha akuzasaun no lezada mós konfirma . Tanba ne'e husu ba tribunál atu kondena arguidu tuir artigu 145 husi KP

Entretantu defeza husu ba tribunál atu aplika pena admoestasaun ba arguidu, tanba arguidu konfesa, arrepende ninia hahalok, promete sei lahalo tan hahalok hanesan hasoru lezada iha futuru no arguidu foin mak primeiravés mai hatan iha tribunál.

## **Desizaun**

Depoizde avalia faktu hatu, tribunál prova katak arguidu komete duni krime ofensa inategridade fízika simples hasoru nia feen ho natureza violênsia doméstika dala rua (konkursu) bazeia ba arguidu nia deklarasaun no lezada mós kontinua konfirma akuzasaun.

Bazeia ba faktu provadu sira no tetu mós sirkunstánsia atenuante sira hanesan arguidu konfesa, arrepende ninia hahalok, promete sei lahalo tan hahalok hanesan hasoru lezada iha futuru, di'ak malu ona no arguidu foin primeiravés mai hatan iha tribunál. Tanba ne'e tribunál konklui prosesu ne'e no kondena arguidu ba iha krime rua, kada krime kondena arguidu ho pena prizaun fulan ualu. Pena rua ne'e tribunál halo akumulasaun hamutuk ba tinan ida fulan neen no husi ne'e tribunál konklui no kondena arguidu ho pena únika tinan ida suspende ba tinan ida.

## **15. Krime ofensa ba integridade fízika simples ho natureza violênsia doméstika**

Nú. Prosesu	: 0104/21.BBMLV
Kompozisaun tribunál	: Singular
Juiz	: Dr. Samuel da Costa Pacheco
Prokuradór	: Dr. Rafael Jerónimo Gusmão
Defeza	: Dr. Albino de Jesus Pereira
Desizaun	: Pena prizaun fulan 8 suspende nia ezekusaun ba tinan 1

Iha 24 Juñu 2022, Tribunál Distral Suai prezide julgamentu leitura sentensa ba krime ofensa ba integridade fízika simples ho natureza violênsia doméstika ne'ebé envolve arguidu UAT hasoru nia feen HdR, iha Munisipiu Bobonaro.

## **Akuzasaun prokuradór**

Prokuradór akuza katak iha 03 Setembru 2021, iha oras tuku 20:00 kalan, lezada tama ba iha sira nia kuartu laran no loke armariu haree tais, kampaña no lipa maibé la iha armariu laran, nune'e lezada husu ba arguidu dehan "*se maka foti tais, kampaña no lipa sira ne'e*" no arguidu hatan "*ha'u maka foti hodi fó ba ha'u nia inan, ha'u foti husu ba ó halo saida asu inan*". Nune'e arguidu ho lezada komesa deskute malu no arguidu nerbozu tuku lezada nia matan fukun parte karuk no lezada tenta halai sai ba liur maibé arguidu ka'er iha lezada nia fuuk depois tuku dala barak iha lezada nia kotuk laran rezulta lezada oin nakukun no monu ba rai.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál tinan 3 ka multa konjuga ho artigu 2, (a) 3 (b), 35 (b) no 36 LKVD.

## **Produsaun ba prova sira**

Iha prosesu julgamentu nia laran arguidu konfesa integralmente ba faktu sira iha akuzasaun no depois akontese arguidu ho lezada di'ak malu fali, arguidu arrepende ninia hahalok no promete sei lahalo tan hahalok hanesan hasoru lezada iha futuro.

Entretantu lezada continua konfirma faktu sira akuzasaun no deklara katak depoisde akontesimentu arguidu ho lezada di'ak malu ona no to'o agora arguidu la baku ona lezada.

### **Alegasaun final**

Prokurador konsidera arguidu provadu komete krime ofensa ba integridade fizika simples hasoru lezada bazeia ba arguidu nia deklarasaun ne'ebé konfesa integralmente ba faktu sira iha akuzasaun no lezada mos continua konfirma akuzasaun. Tanba ne'e husu ba tribunál atu kondena arguidu tuir artigu 145 husi KP

Entretantu defeza husu ba tribunál atu aplika pena admoestasaun ba arguidu, tanba arguidu konfesa, diak malu ona, arguidu arrepende ninia hahalok, promete sei lahalo tan hahalok hanesanhasoru lezada iha futuro no arguidu foin primeiravés mai hatan iha tribunál.

### **Desizaun**

Depoisde avalia faktu hatu, tribunál prova katak arguidu komete duni krime ofensa ba inategriedade fizika simples ho naturezaviolênsia doméstika hasoru nia lezada bazeia ba arguidu nia deklarasaun no lezada nia konfirmasaun ba akuzasaun.

Bazeia ba faktu provadu sira no tetu mos sirkunstánsia atenuante sira hanesan arguidu konfesa, arrepende, promete sei lahalo tan hahalok hanesan ba lezada iha futuro, di'ak malu ona no arguidu foin mak primeiravés mai hatan iha tribunál. Nune'e tribunál konklui prosesu ne'e no kondena arguidu ho pena prizaun fulan ualu tinan ida.

### **16. Krime ofensa ba integridade fizika simples ho natureza violênsia doméstika**

Nú. Prosesu	: 0003/20.CVMCT
Kompozisaun tribunál	: Singular
Juiz	: Dr. Benjamin Barros.
Prokurador	: Dr. Rafael Jerónimo Gusmão
Defeza	: Dr. Albino de Jesus Pereira
Desizaun	: Pena Multa US\$60.00

Iha 29 Juñu 2022, Tribunál Distritál Suai prezide julgamentu leitura akordaun ba krime ofensa ba integridade fizika simples ho natureza violênsia doméstika ne'ebé envolve arguidu CM hasoru nia feen MdS, iha Munisípiu Covalima.

### **Akuzasaun prokurador**

Prokurador akuza katak iha 01 Feveiru 2022, iha oras tuku 13:00, meudia, arguidu rasta lezada nia fuuk, ka'er ai naton ida baku dala rua iha lezada nia ulun parte oin no baku dala ida iha lezada nia liman parte loos, rezulta moras, kanek no bubu. Antes ne'e arguidu fila husi toos mai uma atu han maibélezada la prepara han meudia nian. Arguidu ho lezada diskuti malu no arguidu nerboju halo agreasaun hirak ne'e hasoru lezada. Depois akontesementu lezada ba halo tratamentu iha PRADET.

Prokurador akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (b), 35 (b) no 36 LKVD.

### **Produsaun ba prova sira**

Iha prosesu julgamentu, arguidu hili direitu nonok.

Alende ne'e lezada kontinua konfirma faktu hotu iha akuzasaun no deklarata katak depoisde akontesimentu arguidu husu ona deskulpa ba lezada, to'o agora arguidu la buka ona lezada no lezada pedua ona arguidu.

### **Alegasaun final**

Prokurador konsidera arguidu provadu komete krime ofensa ba integridade fizika simples ho natureza violensia domestika hasoru lezada, bazeia ba lezada nia deklarasaun ne'ebé konfirma faktu sira iha akuzasaun reforsa ho relatoriu mediku husi PRADET. Tanba ne'e husu ba tribunál atu kondena arguidu ho pena suspensaun.

Entretantu defeza haktuir katak, iha perante julgamentu arguidu hili direitu nonok maibe lezada kontinua konfirma faktu hotu, maibe defeza haree katak arguidu ho lezada diak malu fali ona no to'o ohin loron la iha ona problema seluk. Nune'e husu ba tribunál atu kondena arguidu tuir konfiksaun tribunál nian.

### **Desizaun**

Depoisde avalia faktu sira hotu, tribunál prova katak arguidu halo duni agresaun hasoru lezada, arguidu uza ai naton ida baku dala rua iha lezada nia ulun no baku dala ida iha lezada nia liman parte karuk.

Bazeia ba faktu provadu hirak ne'e no tetu mos sirkuntansia hotu hotu ne'ebé haleu krime, nune'e tribunál konklui prosesu ne'e no kondena arguidu ho pena multa US\$60.00, ne'ebé arguidu sei selu kada loron ida US\$1.00 durante loron 60. Bainhira arguidu la selu pena multa refere arguidu sei kumpri prizaun alternativa durante loron 40.

### **17. Krime ofensa ba integridade fizika simples ho natureza violensia domestika**

Nú. Prosesu	: 0001/22. BLLT
Kompozisaun tribunál	: Singulár
Juiz	: Dr. Samuel da Costa Pacheco.
Prokurador	: Dr. Rafael Jerónimo Gusmão
Defeza	: Dr. Domingos dos Santos
Desizaun	: Pena prizaun fulan 8 suspende ba tinan 1

Iha 30 Juñu 2022, Tribunál Distritál Suai prezide julgamentu ba krime ofensa ba integridade fizika simples ho natureza violensia domestika ne'ebé envolve arguidu DM hasoru nia feen SdS, iha Munisípiu Bobonaro.

### **Akuzasaun prokurador**

Prokurador akuza katak iha 15 Feveireu 2022, iha oras tuku 19:00 kalan, wainhira lezada fila husi Dili, arguidu husu lezada dehan "*nusá horisehik ó la fila*" no lezada hatan "*ha'u atu fila ho ojek deit ka?*", nune'e arguidu rona tiha ho nerbosu la'o besik ba lezada tuku kedas dala ida lezada niaibun no inus. Lezada halai maibe arguidu duni tuir no tuku tan dala rua iha lezada nia kanuruk, lezada monu tun ba rai, arguidu ka'er lezada nia liman rasta lezada no arguidu nia liman kukun les kona lezada nia liman parte karuk rezulta kanek.

Prokurador akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (b), 35 (b) no 36 LKVD.

### **Produsaun ba prova sira**

Iha prosesu julgamentu arguidu konfesa ba faktu sira iha akuzasaun, arguidu ho lezada di'ak malu ona, arguidu sei hadomi lezada, arrepende ninia hahalok no promete sei la halo tan hahalok hanesan ba lezada iha futuru nofoin primeiravés mai hatan iha tribunál.

Entretantu lezada kontinua konfirma faktu sira iha akuzasaun no deklarata katak lezada ho arguidu di'ak malu ona no arguidu mós to'o agora la baku ona lezada.

### **Alegasaun finál**

Prokuradór konsidera arguidu provadu komete krime ofensa ba integridade fízika simples ho natureza violênsia doméstika hasoru lezada bazeia ba arguidu nia deklarasaun ne'ebé konfesa ba faktu sira iha akuzasaun no lezada kontinua konfirma faktu sira iha akuzasaun. Tanba ne'e husu ba tribunál atu kondena arguidu tuir artigu 145 KP.

Entretantu defeza husu ba tribunál atu fó justisa ba arguidu bazeia ba faktu sira ne'ebé produs ona iha julgamentu nia laran.

### **Desizaun**

Depoiz de avalia faktu sira hotu, tribunál prova katak arguidu tuku dala ida iha lezada nia ibun no kona inus, tuku dala rua iha lezada nia ulun no kaer lezada nia liman riba ba rai.

Bazeia ba faktu provadu sira ne'e no tetu mós sirkuntánsia sira hanesan arguidu foin primeiravés komete krime mai hatan iha tribunál, arrepende ninia hahalok no promete sei lakomete krime hasoru lezada no ema seluk, nune'e tribunál konklui prosesu no kondena arguidu ho pena prizaun fulan ualu suspende ba tinan ida.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: [ana@jsmp.tl](mailto:ana@jsmp.tl)

[info@jsmp.tl](mailto:info@jsmp.tl)

Website: <http://jsmp.tl>